

Mutze-Bebbi Bärn – Fasnacht 2002

isch s'Sujet
hällschwarz oder dunggelschwarz?
mir finde's ganz nit luschtig.

Die vom Voordraab synn druurigi Figure
D'Ladäärne isch dr Situation aapasst
Dr Dambuur drummet schuurig druurig
D Pfyffer bloose us em letschte Loch
und beduure d'Fasnacht
– die ainzig Hoffnig lauft ganz in wyss.



Dä Zeedel do isch schwarz wie d'Nacht
- symbolisch fir ä gränzeloosi Oomacht,
wo-n-ys alli het ergriffe,
gschittlet und us dr Gwooned grisse.

Au s'Goschdyym het e Farb wie d'Raabe
und s'Zygli duet 'so druurig ummedraabe
d'Larve verschteggd die verschreggte Gsichter,
ains vo däne isch das vom Zeedeldichter.

Dr Schorsch - nid dä vom Haafebeggi zwai
- dä mit em Dabbelju - dä het dehai,
es isch verruggt - sich fascht verschluggt,
will är bim Tiwi gaffe, e Brätzel het verdruggt.

Und d'Moral vo dääre Gschicht,
(sy gilt au fir mänggs andere Kojotegsicht):
Me sott halt vor em Schlugge kaue,
undmitem Hirni dängge, vorem schnuure und em haue.
Drum merk'dr: wär synere Mamme nyt duet folge
dä griegt ins Rainheft e ganz e digge Dolgge.

D'Israeeli und d'Araaber
spille's zämme ächt makaber.
Die ainte tribes mee im dunggle,
die andere schiesse grobi Runggle.
E Druurspiil dert im nooche Oschte
e Waansinn wo vill Goodwill duet koschte:
Aug' um Aug' und Zaan um Zaan:
wenn hört er ändlig uf - dä Vergälytgswaan?

Oschpel, Corti, Honegger und Konsorte
die verdiene se - die fliegendi Torte.
Au dr Rainer - dä vo Zyri – finde miir nit Guet
dääwääg wie'n'äär immer duet.
So wie d'Frau Spörry, die gschtöpfdi Tante,
isch au äär ain vo dääne Süffisante,
wo miir am liebschte ooni Fallschirm däte lo lande.
En andere vo däne iberheebliche Zogger
- era il maledetto Signor Blogger. . .

Mängge findt, s'syg nymm wie friener
mit blutte Fiess umezfliege – so wie d'Hiener.
Dr Mond luegt obenaabe blaich und faal
und dänggt sich - die Wält do unde syg fatal. . .

D'Ladäärneusstellig isch vom Mändig z'oobe, em 18. Hoornig bis
am Mitwuche demoorge, em 20. Hoornig uff em Minschterblatz.

www.fasnacht.ch/mutze-bebbi